

Chhuah fan: Oct., 1984

MARCH, 2018

RAMTHAR



GOOD FRIDAY SERMON

"KA PA, ANNI HI NGAIDAM RAWH"

(phêk 5-7)



RAMTHAR ASSOCIATION CHANCHIN BU THLA KIP CHHUAK

EDITORIAL BOARD 2016 - 2018

Editor	: Rev. Thangzauva	9612950043 (M)
Joint Editors	: Dr. Robert S. Halliday	9862374232 (M)
	Upa Zoramthanga	9436362385 (M)
	Pl C. Lalrampárl	9436190803 (M)
News Editor	: T Upa Lalbiakênga Fanal	9436366234 (M)
Cir. Manager	: Pu Lallawmnakima Hmar	8575178109 (M)
Publisher	: Rev. K. Lalrinmawia	9485140409 (M)

[Office hun chhúngin biak ni thei se]**Member-te**

Rev. F. Lalrinnunga	: Synod Moderator
Rev. R. Dengzkipula	: Synod Secretary (Sr.)
Rev. B. Sangthanga	: Executive Secy., i/c Mission
Rev. Lalremruata Ralte	: BEC Member
Upa H. Thangmawizuala	: BEC Member

Thu chhuah túr nei chuan Email - ramtharchanchinbu@gmail.com-ah emaw lehnam chauhvah ziaikin Editor emaw Cir. Manager, Ramthar Chanchin bu, Synod Office, Aizawl, Mizoram (India) hnênah emaw thawn túr a ni e.

Ramthar Chanchinbua thu chhuah hi a ziaaktu mawhpurhna a ni.

SYNOD MISSION BOARD HOTUTE:

Rev. B. Sangthanga	Executive Secretary	9436372139
Rev. K. Lalrinmawia	Secretary	9485140409
Dr. Robert S. Halliday	Coordinator	9862374232

KUM KHAT LÂK MAN - ₹ 60/-

A CHHÚNGA THU AWMTE

- | | |
|--|---------|
| 1. Editor thukhawchâng | - 1 |
| 2. Keimahni | - 2 |
| 3. Field Chanchin Thar | - 3-4 |
| 4. Sermon | - 5-7 |
| 5. BUHHMUN AṬANGIN: | - 8-26 |
| (1) Manikbond Bial chhúnga Pathian hnathawh | |
| (2) Evangelist Teacher-te hian eng nge an tih? | |
| (3) Rohmingthangi Memorial School Gospel Week | |
| (4) 2017 Baithakhhal Krismas Utsav | |
| 6. Ramthar rawngbâwina | - 27 |
| 7. Ramthar Feh | - 28-32 |

KRISTA KRAWS CHU

Kraws hi Phoenician-ho emaw Karthaki-ho emaw tihchhuah niin sawi thin a ni. Grik leh Rom-ho pawhin an hmang. Rom-ho chuan Rom mi ni lo - Bawih leh salte, tual that te, suamhmang te, phiarrûk hmang te, khua leh tui phantsantu te leh helho te hrem nân an hmang thin. Judate chuan thinga khai apiang chu Pathian anchhedawng a ni, an ti (Deut 21:23).

Mi sualte thihna hmun Kraws kha Pathianin a fapa Isua Krista hmanga khawvel chhandam nan a thlang. Kraws-a Isua khenbeh a nih aţang khân Kraws chuan awmze thar a nei ta. Tirhkoh Paula chuan, *“Kei erawh chuan kan Lalpa Isua Krista Kraws lo chu ka chhuan loh turzia mai chu, chumi azarah chuan khawvêl hi ka tân khenbehin a awm ta, kei pawh khawvêl tân khenbehin ka awm a ni,”* a ti (Gal 6:14). Krista Kraws chu khawvêl nêna inkhenbeh tawna a ni.

Paula vêk chuan *“Kraws chuan intaina a tihlum,”* a ti. Isua Krista chu kan inremna a nihzia sawiin, serh tan leh serh tan loh te, Juda leh Jentail-te chutah chuan an inrem tih a sawi chhuak a. Krista leh a Kraws kan hnaih poh leh mihringte hi kan inrem thin.

Miin Kraws a en chuan ama sualzia a hmu a, Pathian ngaihdamna ropuizia a hre chhuak thin. Kraws-ah chuan thiltihtheihna a awm a, tlâwmna leh hnehna a lang bawk.

*“Kraws thisenin mi chak thei lo,
Huai berah a chantîr thei.”*



KEIMAHNI**† TUARPUINA:**

1) Upa Zaliana (60), Ramhlun Vengchung, Ramthar Chanchinbu Agent chu thaw-hah avàngin ni 7 November, 2017 khán a thi.

2) Pu Vanthanghuma (71), Zemabawk, Pu Vanchuangpuia, Headmaster, Jonai (Arunachal North) pa chu ni 28.01.2018 khán zun thlum avàngin a thi.

3) Pi Chuauzami kum 81, Pukzing, Pu Joshua, Evangelist, (Patna Mission Field) nu chu ni 10.02.2018 khán a thi.

† RAMTHAR CAMPAIGN: February thla chhúngin Presbytery pali-ahte hian Ramthar Campaigner-te an kal, hetiangin: **Tuivawlrál** - *Upa V. Neihkungá, Rev. J.H. Zaikima leh Upa Vanlalzuia*; **Hmarchhak** - *Rev. K. Lalthangmauia, Pu C. Kapthanga leh Pu R. Lalchhanhima*; **Tuivawl** - *Rev H. Lalmuanchhana, Pu K. Zothlamuana leh Rev. Lalremruata Ralte*; **Chhimtawp** - *Upa Vanlalngaia, Rev. Lalrintluanga, Pu C. Lallianthanga leh Pu Lallawmnakima Hmar te.*

† PRO PASTOR ORIENTATION: Kumina Probationary Pastor lâk thar mi 17-te pualin ni nga (13-16 Feb., 2018) chhúngin Synod Conference Centre-ah Orientation neih a ni a. Hetah hian Mission Field-a Pro Pastor thar mi pali - R. Lalmawizuala (*Daporijo, Arunachal North Field*), Deep Chand (*Meethepur, Lucknow Field*), Jerry H. Lalrinchhana (*Guwahati, Assam Field*) leh R. Lalfakawma (*Changlang, Arunachal Field 'E'*) te an tel kim thei a ni.

† PROJECT LIST 2018: SMB hnuaia Mission Field hrang hrangte mamawh tàr lanna Project List chu peih a ni a, Synod Office ațangin a lam theih.

Facebook lamah SYNOD RAMTHAR Group-ah a *pdf*-in a *download* theih bawk. Amaherawhchu, chhángtu/hauhtu an awm apianga danglam (*update*) a nih òthin avàngin a chháng turtén Office lama zawh fiah zêl òthin ni thei se, a òtha hle.



FIELD CHANCHIN THAR

SILIGURI MISSION FIELD: Siliguri Mission Field hi North Bengal Area lama kan Mission hma lâkna hmun pawimawh tak pakhat a ni. Assam, Sikkim, Bhutan, Nepal leh Bihar State te kârcheha awm a ni. Kan rawngbâwlna hmunah hian ƣawng hrang hrang - Hindi, Bengali, Nepali, Sadri, Rajbongsi, Djongkha ƣawng hmangte an awm a. Sakhuana lamah chuan Hindu, Buddhist, Muslim leh Nepali Tribal religion etc, te an ni hlawm.

Kum 2017 Synod-in a ruahman angin ni 14.1.2018-ah khân Jaigoan leh Mirik Pastor bial thar pahnih a piang ve leh ta a. Tûnah hian Pastor bial 6 lai kan lo ni ve ta. North Bengal Area lama kan hma lâknaah hian hmun 58-ah Missionary leh Field Worker te kan indah mék a. Hmun 23-ah kan member-ten Pathian an biakna hmun tûr Biak In kan nei tawh a (thênkhat hi chu tê reuh tê tê an ni ve). Hmun dangah hi chuan a remchan dân angin thawktute inah emaw, member In remchang dangah emaw te kan inkhâwmpui ƣhin. Kum 2017 chhúng khân ringthar pawh 205 zet Pathianin min pe ve a. Pathian khawngaihna azârah member pawh 2,116 lai kan lo nei ve ta!

Evangelist-te hian rim takin Chanchin ƣha hril hna an thawk reng a. Medical Mission hi Nurse paliten anmahni Centre ƣheuh bâkah hmun hrang hrangah an kalpui bawk a. Tailoring Centre hmun thumah kan siam a; nikum lam aƣang khân an pualin Gospel Week kan neihpui bawk. Kan Missionary-te zingah Music thiam takte hmangin Music class kan kalpui chhin a, a tih chi dawn viauin kan hria. Tin, hmun thumah Non-Formal Education kan kalpui mék bawk.

Sikkim lamah Evangelical Presbyterian Church of Sikkim (EPCS) te nèn thawk hovin Evangelist 12 kan ruai mék a. Darjeeling tlang lamah hma thar lain thawktu kan indah ta bawk a. Bhutan ram lama Chanchin ƣha hril hna nasa zâwka thawk tûrin ƣan kan la chho mék zêl a; Bhutan-ah hian Native Worker panga kan ruai a, member 400 chuang zet kan nei ta bawk a, a phurawm zual hle a ni.

Kan rawngbâwlna hmun tam ber hi West Bengal ram a ni a. Trinamul Congress Sorkârna hmun a nih avângin Chanchin ƣha hril kawngah harsatna kan nei lutuk lo va, kan zalen rih hle. Kan hma lâkna lian tak pakhat, Bhutan ram erawh Kristianna duh lo ram an ni a. Zalen taka Chanchin ƣha hril theih a la ni lo. Heti chung hian theih tâwp chhuahin kan bei chho mék zêl a, Kohranho ƣawngtâina avângin Lalpan a ram a zauh zêl ang tih kan beisei a ni.

- Rev. Lalhrualtuanga Ralte, FS, SMF; Mobile: 97745 88364

ODISHA MISSION FIELD: Odisha Mission Field hian ringthar nei tùr zawng hian hma kan la la nasa thei vak lo a ni ber a. Ringtu kohhran awm tawh sa enkawl hi kan hna pui ber a ni rih a. Nikum kum chanve hnu lam hret aṅang khán ringlote ringtua siam tùr zawng hian bul kan ṭan ve deuh chauh a ni.

2017 chhúng khán baptisma chang thar mi za zet kan nei a. Heng baptisma chang thar kan neihte hi a zahve zet chu report an ni lo thung a; thla thum dân report hnunng ber, October – December-ah erawh chuan baptisma chang thar mi 50 zet report an ni ve ta.

Tûnah hian kan rawngbàwlna lian ber chu Presbyterian kohhran kalphung zirtír leh thilpêk lam zirtír a ni deuh ber rih a. Missionary-ten an awmchilh loh khua hi a tam zawk a ni bawk a. Chûng missionary-ten an awmchilh loh khuate chu Pathianni tin an inkhawm-pui thung a, chu chu *attach kohhran* tiin kan sawi ṭhin. An khawtlang nun leh rorèlna leh kohhran rorèlna hi hrui thum hrual kan tih ang maia inphuar nghet a ni a. Chu thil pathum inphuar nghet tak aṅanga kohhran rorèlna lâk hran emaw, kalpui dân tùr emaw hriatthiam a har hle a; kan la zir mék a ni ber mai.

Tûnah hian Oryia ṭawnga zirlaibu-te siamin, khaw 14-ah Sunday School ṭha taka kalpui a ni a. Zirlaibu Oryia ṭawnga siamin khaw 5/6 vèlah Naupang Sunday School neih a ni bawk.

Kui hnam hi an danglamna tak chu, an khuaah chhúngkhat laina emaw, hmehriat ṭhian ṭha tak neih loh chuan an khuaah hian zàn riah an phal lo tlánpui a. Chu chuan duh duhna hmuna hma lâk leh rawngbàwl bul ṭan a tihharsat deuhna lai a awm a. Chutih lai chuan khaw ṭhenkhat, ringtu in hnih khat lek awmnaa hmehriat leh ṭhian siam tuma kan hma lâkna-ah te erawh chuan Pathian malsawmna kan dawng zêl thung ṭhin.

Tûnah hian Hindu hlang khaw hnih Khambejuri leh Teliapoli-ah te hmehriat leh ṭhian siamin kan lût ṭan mék a. Khambejuri phe chu ringtu awm lo mah se Krismas-te hmanpuiin *crusade* tenau deuh neih a ni a. Volley Ball Tournament te neihpuiin kan inṭhian ṭha hle tawh a ni. Teliapoli-ah pawh *film* te chhuahin *medical clinic* te neih a ni a, an inhawng hle. Tin, heng khua Chipraguda, Gursibadi, Sanosiguru, Karbay, Borakhoni, Similiguda, Luhakhal-ah te hian ringtu tlém-tê awmte hmehriatin an khuaah rawngbàwlna bul kan ṭan mék zêl bawk a. Bhubaneswar-ah pawh fellowship tê deuh chu pahnih kan nei dawn ta reng mai. Kohhranhote min ṭawngṭaipui reng tùrin kan sáwm che u a ni.

- Rev. Lalramdinthara Colney, FS, OMF: Mobile: 078940 77312



GOOD FRIDAY SERMON “KA PA, ANNI HI NGAIDAM RAWH”

Chhiar tùr: Luka 23:34

*Rev. Thangzauva
Editor, ‘RAMTHAR’*

Kan thupui, ‘*Ka Pa, anni hi ngaidam rawh*’ tih hi Lal Isua Kraws-a an khenbeh laia a thusawi pasarih zingá pakhat a ni. Sual rêng rêng hre lo leh thil tihsual nei lovin amah khéngbettute tán a Pa Pathian hnênah ngaihdam a dilsakna a ni.

1. Kraws-a khénbehte dinhmun: Persia-ho chuan lei chu Pathian siam a ni a, Vàn pawh Pathian awmna a ni an ti. Chuvàngin, mi sual thi tláka an ngaihte chu lei si lo, vàn si lovin Kraws-ah an khéngbet thín. Rom-ho chuan Rom mi ni lo - bawih leh sal te, tual that te, suamhmang te, phiarrúk hmang te, khua leh tui nihna phatsantu te leh helho te hrem nán Kraws an hmang thín. (*John L. Mc Kenzie, Dict. of the Bible. p.161*). Mosia dân chuan ‘*thinga khai apiang Pathian anchhedawng a ni si á*’ a ti (Deut 21:23). Kraws chu dam lai pawha thi tláka an ngaihte hremna hrehawm leh zahthlâk bera an ngaihte thihna hmun a

ni. Kraws-a khenbeh ve mi pakhat chuan, “*Keini zawng hrem zia rêng kan ni, kan thiltih man chauh hmu kan nih hi,*” a ti a (Lk 23:41). Pilata pawhin a sualna a hmu chuang lo va; chuti chungin Kraws-ah khenbeh a ni. Zawlnei Isaia chuan, ‘*Kan khawlohnate avàngin vuak thitlinin a awm,*’ (Isa 53) a ti.

2. Ka Pa, anni hi ngaidam rawh: Vawikhat chu Nigeria rama Tual-chhúng indo laiin mi pakhat hi a nung chungin phùm an tum a; amah phumna tùr ‘thlàn’ an laihtír a. A phùm tute chu anchhia a lawh nasa hle a ni, an ti. Kan Lalpa chuan amah khéngbettute tán a

ṭawngṭaisak a, “*Ka Pa, anni hi ngaidam rawh, an thiltih hi an hre lo a nih hi,*” tiin (Lk 23:34). Rom-ho dānah chuan mi an khenbeh chuan, ‘*Ka thihna hi ka thiltih sual tlanna ni rawh se,*’ tia ṭawngṭai tūra ngaih an ni.

Isua erawh chu mi dangte sual tlan nān a thi a. ‘*Ka Pa, anni hi ngaidam rawh,*’ tih hi a Grik ṭawnga a awmze dik taka lehlin chuan - ‘*Ka Pa, anni hi ngaidam rawh*’ tiin a ṭawngṭai mawlh mawlh a tihna a ni. Kraws-a khenbeh a nih lai pawh khan Isua chuan mite sual ngaihdam an nih theih nān a ṭawngṭai avāngin Kraws-a khenbeh mék pahnih zīnga a pakhat zāwk chuan Pathian ngaihdamna a chang a, Paradise-ah a chawlnghāl.

Pathian Fapa thihna chuan kan sual kaidum ber pawh a silfai ve nghāl thei: ‘*Kan sualte thupha kan chawi chuan kan sualte ngaidam tūr leh, kan fel lohna zawng zawng tlèng fai tūrin amah*

chu a a rinaumin a fel a ni (1 Jn 1:9)

3. Pathian ngaihdamna chuan hmangaih Pathian a nihzia a tilang:

Tirhkoh Paula chuan, ‘*Kan bawhchhiatnate min ngaidam a; batna lehkha, thupêka ziak kan chungawm, min dodal ṭhina chu a thai bo tawh si a. Chu ngei chu Kraws-a khéngbetin a la kiang ta a,*’ a ti (Kol 2:13, 14). Min ngaidam chauh pawh a ni lo; mi sual thiam loh chang tawh hnu kha thiam min la chantír zui cheu nia! Bawhchhiatna sual avānga thiam loh chang tawh hnu, ‘*thiam lo hmīn der hnu*’ kha a Pa Pathian hmaah kan aiawha dingin thiam kan chan theih nāna min sawisaktu a ni. Thiam chantírtu kha Krista a ni si a, tuin nge thiam loh chantír ang? Thil tisuatu thiam chantír hi mihringin a ti thei lo. Sawrkar rorèlna Court pawhin a ti ngai lo.

Keini erawh chuan Ukil ropui Isua Krista, min sawisaktu kan nei. Ahming pawh ‘Remruattu Maka!

(Wonderful Counsellor) a ni. Chuti taka hmangaih avànga nunna min petu chu hla siamtu pawhin, ‘A hmangaihna a chak a ni,’ a ti thlâwt. Hla siamtu dang pawhin a sawi thiam dân berin - ‘Chuti takin min hmangaih a’ a ti. Hmangaih avànga mi sual ngaihdamna hi sawifiah phâk a ni lo.

‘A hmangaih thûkzia puang
tûrin,
Seraf-te pawhin an phâk lo’
(KHB No.184).

4. Pathianin min ngaidam ang bawkin, mi dangte kan ngaidam ve tûr a ni: Missionary ropui C.T. Studd-a (1862-1931) chuan “*Isua Krista hi Pathian a niha, ka tán a thi a nih si chuan a tána inhlanna thûk lutuk a awm thei lo,*” a ti. Mi dangte tána inpêkna thûk zo a awm thei lo. Lal Isuan ÷awng÷ai dân min zirtirnaah chuan, “*Kan chung a thil tisualtute kan ngaidam angin, nang pawhin kan thil tihsual ngaidam ang che,*” a ti. “*Mi an bawhchhiatte in ngaihdam chuan, in Pa*

vàna miin a ngaidam ve ang che u. Nimahsela, mite in ngaihdam si loh chuan, in Pain in bawhchhiatte a ngaidam bîk lo vang”. Biang lehlama bêngtu chu lehlam pawh dawh rawh a la ti ta zêl a ni. Thil tisualtuin ngaihdam a dil chuan vawi sarìh hmun sawmsarìh (7x70=490) ngaidam tûrin min zirtir; a ÷ûl zât zât, vawi eng zât pawh tihna a ni a. ‘*Pathianin Kristaa a ngaidam che u ang bawkin nangni pawh inngaidam ve rawh u*’ tiin Tirhkoh Paula pawhin min hrilh bawk. Isuan mi a ngaihdam chu a theih-nghilh ÷hak, a hre zui ve ngai lo.

Khéngbettu, sawiseltu, sawisatu, tihchhiat vek duhtu, tihhlum tumtute Isuan a ÷awng÷aisak, “*Ka Pa, anni hi ngaidam rawh*” tiin. Pathian ngaihdamna changtute hian mi dang kan ngaidam ve tûr a ni a, chu chu Isua rilru, hmélmate hneh dân ÷ha ber a ni.

Lalpan a thu malsawm
rawh se. Amen



BUHHMUN ATANGIN MANIKBOND BIAL CHHÚNGA PATHIAN HNATHAWH

*Rev. Vanlalliana Sonset
i/c Manikbond Pastor Bial*

Manikbond Pastor Bial hi Assam, Mizoram leh Tripura inri-na, Assam ram chin, Langkaih lui ruam, Karimganj District-a awm a ni a. Kohhran inenkawlnaah chuan Barak Area Church and Mission chhúnga Cachar Tlangram Presbytery hnuaia awm a ni. Tlang mite zingá rawngbàwl kan ni.

Tùnah hian Zohnah-thlâk Ranglong leh Chorei khaw 11 leh Bru khaw 1-ah rawng kan bàwl mék a ni. Anmahni khuaah chuan chibil ãawng kan hmanga, Bial pum huapah erawh Mizo ãawng kan hmang thung.

Kum 2015 ațang khán Manikbond Bial Vision 2030 kan kalpui a; chumiin a tum lian tak mai chu Manikbond Bial huam chhúnga Tlang mite mi 2,557 chuang lai mai Kristian la ni lote Kristian-a siam hi a ni.

He Vision tihhlawhtlin nán hian kawng 5 (nga)-in hma kan la mék a.

1. Direct Evangelism:
'Hei hi thu hmanga rawng

kan bàwlna' ti ila kan hrilhfiáh kim ber mai àwm e. Kan hma lâk dân tlangpui.

(a) Mi kawngkhar kika mi ina Pathian thu va sawi leh ãawngtaina va hman.

(b) An hna ãul thawhpui paha Pathian thu dawng-sawng thei tura an thinsung buatsaih.

(c) Target (mihring/ chhúngkaw bik) neiha hma lâk.

(d) Harsatna an tawh lai remchánga hmanga Pathian thu ang zêla a chinfelpui dân zawnpui.

(e) Chawhlui buatsaiha, a huhova *One Day Counselling* neihpui.

(f) Projector hmanga Film Show neih.

(g) Khawlaia Pathian thu sawi.

(h) *Outreach* a tam thei ang ber neih.

2. Medical Ministry:

Missionary Nurse (Staff Nurse) hmanga tihdam rawngbàwl hna kan thawh hi *medical ministry* chuan a kawh ber chu a ni. Medical rawngbàwlna hi a hlu a, ringlote thinlung vuak dūpna tha ber pāwl a ni àwm e. Pathian lam hawi vak lote pawhin natna an han tawh hian, tidamtu an dap lo thei lo va, hemi tak hi *Medical Ministry* rawngbàwlna a remchan bīkna (*advantage*) a ni. Evangelist-te thlen phāk loh kha an thleng pha tlat. He rawngbàwlna kan kalpui mēk dân leh tih atāna tha han tár lang ila.

(1) *Clinic*-a rawn inen-tírte lo buaipuia, a tláwm thei ang bera damdawi leitir.

(2) *Outreach* kan neih laia *Clinic* lo hawn.

(3) Damlo an awm chángan ina kan.

(4) *Clinic* rawn pantute leh damlo an va kante damdawi an pēk hma leh an en tak tak hmaa tawngtaina hman.

(5) Sawrkar Nurse / Private Nurse-ten an thlen phāk loh an taksa mai piah lamah an thlarau thlenga damna an chan theihna atāna Isua Krista hman-gaihna lantir; mahni hrehawm / tuar khawpa ngaihsak (Emphatic care).

(6) An nat dân azira Damdawi In thlenga hrui.

3. Educational

Ministry: Manikbond Bial chhúngah hian Sikul kan nei lo va. Theih tawp chhuahin Mission Sikul kan neih theih nán kan bei a; mahse, Lalpan tūl a la ti rih lo a ni ang e, kan la hlawhtling hrih lo va. Kan rawngbàwlna hmun en hian Mission Sikul chu nei ila, tih vawng vawng cháng kan ngah mai. Beidawng lovin Pathian hnénah kan la dīl zēl.

Tūna zirna in kan neih chhun chu Manikbond-a Craft Centre hi a ni a. Kum tin puan thui zir tūr zirlai 10 kan la a, tha taka zir chhuakte chu *Puan thui khawl* kan pe nghāl thin. Craft Centre rawngbàwlna kan kalpui dân han tár lang ila.

(1) Ni tin zirlai zir òan hmam *devotion* neihpui òin a ni. Hetah hian zirlaite a inchhâwkin hun hmantír òin an ni a. Hemi bâkah Pastor te leh Evangelist ten hun an va hmang òin bawk.

(2) Kan zirlaite hi puan òui an zir paha an thinlunga Chanchin Òa òui hnántír hi kan tum ber pakhat chu a ni.

4. Economic Mission:

Kan rawngbâwlna hmun hi ramrî tih takah sawrkar lam pawhin a ngaihsak tâwk lo hle a. Tin, tlang mi ngatte pheï chuan ngaihsak an hlauh lo lehzuâl. Sawrkar hnathawk chhúngkaw tlem tê tih loh chu an leilet zim tê neih hi an inngahna a ni mai a. Chuvàngin, an khawsak a harsain tisa tak pawhin chhan chhuah an ngai hle mai. Economic Mission hnuai a hma kan lâk tawhna leh kan lâk zêl dân tûr te lo sawi ila:

(1) Manikbond Zailu Area-ah Mini Water Supply Scheme Project Proposal ₹ 12,00,000.00 senna tûr kan siam chu World Vision India-ten min pawmpuiin, sum an rawn *sanction* a.

Nimahsela, an *Contractor* thlan a fuh loh avàngin beisei ang erawh chuan a hlauhwtling lo.

(2) Sateldung khua chu World Vision sum vêka motor tê chi kal tlang theiha lai a ni a. Hetah hian Sateldunga kan Missionary-te an òangkai hle.

(3) SELZ Foundation, Chanmari, Aizawl-ten a pung awm lova a òul apianga hman tûrin ₹ 90,000.00 min rawn pe a. Hemi hmang hian kan Bial chhúngah nikum khân hma kan la a. Vawk notê leh sangha notê leina tûr sum te semin hlâwkpuï pawh an awm nual.

(4) Kan Bial chhúngah Jugicherra, Sobricherra, Sateldung, Medili, Khulicherra, Simluang leh Langkhanphong-ah te chuan Electric Current a la lût lo va. Hêng khuaahte *current* a luh theih nân Bial Standing Committee chuan khawtlang hruaitute nèn hma an la a. Tûnah hian *current* lût tûrin a ban phurh thlen a ni hlawm tawh. Kan lâwm hle.

(5) MDTC, Bualpuiah Carpentry leh Veterinary lam *training* tûr kan intír a,

tûna eizawnaa hman̄g ta pawh an awm a. La intirh zêl tum a ni.

(6) Kan member-ten huan nghet te, sum chang thei thlai te chin nachang an hriat theih nân Kohhranin hma kan lâkpui.

(7) Kan thalaiten hna nghet (Sipai, Police, Sawrkar hna) an neih theih nân kan ngaihvenpui.

(8) Kristianna hian thlarau chhandamna piah lamah *economic development* a keng tel a ni tih hi kan au hla pakhat chu a ni.

**5. Kohhran sawh-
ngheh:** Kan Vision-in a tum ber pakhat chu Kohhran puitling din a ni. Kohhran puitling tih hian a sawi tum ber chu: Mahni intodelh, Mahnia ro inrêl, Mahnia Chanchin Ṭha hril leh mi dangte ṭanpui theitu nih te hi a ni. Hemi kawnga kan hma lâk tawhna leh hma kan lâk zêlna tûr han târ lang îla.

(1) Kan khaw luh tawhnaah Biak In hmun leh Mission hmun nghet neih zêl.

(2) Biak In a ṭha thei ang bera dinpui zêl. Hetah hian tûna kan *policy* kalpui

mék – tualchhúng mite ṭantîra, theih tâwpa sum leh pai leh thâ thawhtîra, an tih theih bâka Pathian hnênah min pui theitu dil hi a la fuh zêl chuan a hriat.

(3) Thilpêk - sâwma pakhat, buhfaiṭham leh thawhlâwm thawh zirtîr zêl. Keini Missionary-ten kan sawi piah lamah a tualchhúng mi ngei Campaigner-a kum hnih chhúng hmanga Finance Campaign kan neih hi a sâwt viau chuan a hriat. Synod-a kan sum chhun luh pawh a pung chho ve zêl a, hetiangin: April 2014- March 2015-ah ₹ 4,03,475; April 2015 – March 2016-ah ₹ 5,77,174; April 2016 – March 2017-ah ₹ 6,66,783

(4) Bial hmingin Missionary pakhat kan châwm a, kumin aṭangin Bial Kohhran Hmeichhiain pakhat châwm ve leh an tum a. Manikbond Kohhranin pakhat châwm an tum bawk a, a lâwmawm hle.

(5) Kohhran tinin ringthar *target* kan neihte hmu tûra ṭan lâk. Manikbond Kohhran bîkah chuan Kohhran Committee member-ten ringlo chhúngkaw

target tûr bik an insiam a, a tha hle. Anmahni leh anmahni inveitir hi kan thil tum pawimawh tak pakhat a ni.

(6) Presbyterian Kohhran zia kan inzirtir chhoh zêlna atâna Leadership Training neih chhunzawm zêl.

(7) Luang chhuak nun nei tûra kan Kohhran dinte buatsaiha, Bial Inkhâwmpui *agenda* atân pawh he lam hawi uar deuh deuh.

Hetianga mumal taka hma kan lâkna hian kum 4 hmêl chu a lo hmu ve ta reng a. Pathian hnathawh ropui tam tak kan hmuh zinga thenkhat han târlang ila.

1. Sateldung khua:

Sateldung hi Chorei khua, in 20 an ni a, *motor* kawngpui atanga Km. 1 vêla hlaah n awm a. Kum 2012 hma lam chuan Kristian pakhat mah an khuaah an la awm lo va. Pi leh pu sakhua leh Hindu Sakhua chawhpawlh chu an sakhua a ni. Zu an in a, an chhuang baw a, an in leh a vêl te pawh a fai tâwk lo hle a; bazar kawng mumal pawh nei lovin lui

dung an zawh tawp zêl. A la thim hle.

Kum 2011, April thlaah khaw thenawma Missionary-te chu Sateldung khuaah hian léngin Chan-chin Tha (Pathian thu) an hrilh tan a. Missionary-te hian an hun remchâng apiangah tlawhin Pathian thu an hrilh thin a. Chumi azârah a kum leh ni 6.4.2012 (Good Friday)-ah mi 14-ten Bialtu Pastor Rev. R. Vanlalruata kutah Baptisma an chang a.

Pastor leh Bial chhúng thawktute chawmin thawktu, Pu Vansanmanika dah nghâl a ni a. Ani hian thahnemngai takin rawng a bawl a. Zu tel lova eizawna dangte zawnpui an ni a. An nulatesn Craft Centre-ah puan thui an zir a, an tlangyal 2 (pahnih)-in MDTC, Bualpui-ah Carpentry an zir baw a, huan siam lamah hma nasa taka lâkpui an ni baw. Kan Kristian member-te chu zu-ah an fihlim vek tawh a ni.

Sateldung khuaah hian Kristianna a luh

aṭangin hmuh theihin hmasâwnna tam tak a awm a. A khua a thianghlim a, an in sak dân pawh a danglam tawh a, a mi chêngte an inlungual a, mi mal tinte taksa, thawhnaw leh mutbu thlengin a fai a. Êk in nei ngai lo khân êk in an nei a, tukhur nei ngai lovin tuikhur an nei a. World Vision India-te ṭanpuinain kum 2015 March thla khân kawng pawh laiḥ tlang a ni a, an khaw chhúngah motor pawh tlan lût theiin lui dung zawh a ngai tawh bîk lo. Electric Current nei mai tûrin a ban pawh phurh thlen tawh a ni.

Ringtu pung chho zêlin tûnah chuan member 68 lai an ni ve tawh a. Taksa, rilru leh thlarau lama an hmasâwnna hi hmuhnawm tham a ni. Kan ringthar, an khaw hotupa (*Headman*) Pu Lalan heti hian a sawi a, *“Heti khawpa sakhua ṭha hi engati nge hmân hmânah kan lo hriat loh? Tûnah chuan kum 60 chuang ka ni tawh a, ka rilru awm ang pawhin ka che thei tawh si lo va,”* tiin.

Sateldunga kan ring-tharte chuan zu sak leh zawrh bansanin Isua Krista hming avàngin thlantui luang zawih zawiha eizawna dang thawk tûrin an insiam rem ngam asin. Anmahni Chanchin Ṭha hrihltu Missionary-te chhuahna, Mizoramah chuan sawrkar berin zu a zuar tih hi an hriat hrih loh hrâm kan duh.

2. Khulicherra khua:

Khulicherra khua hi Ranglong leh Chorei inawm pawlhna khua a ni a. Roman Catholic, EFCI leh Baptist Kohhran ten kum 30 chuang an ṭhutchilh khua a ni. Ringlo eng emaw zât an la awm thung. An khuaa ringlo la awmte hi Kristian-te chuan an ṭha en mai mai a, Kristiana siam theihah pawh an ngai tawh lo.

Kum 2015-a Campaign neih kan va tum pawhin an beiseiawm loh thu leh hun paihna mai mai a nih thu chu kan thu dawn tam ber a ni. Nimahsela, Isua Krista hminga rinnaa len va den chu kan tum fan a. Kum 2015 April thlaah Manik-

bond Bial chhúnga missionary zawng zawng te, Bialtu Pastor hovin beihpui thlák tùrin kan riak lût a.

Group 4-ah insiamin House visit, an hna ùl thawhpui, *film show, clinic hawn*, Open Air Preaching te kan nei a. Hêng bâkah hian Group 4-te hian a inchhâwkin ÷awngtai khawlah ÷angin theih tâwp chhuahin kan ÷awngtai reng a. Kár tâwpah meuh chuan Pathian thiltihtheihna kan hmu ta. An khuua Chorei Hindu Bâwlpu (Ochai)-te leh an Kalim (Roréltu) te chhúngkua chuan an sakhaw hlui kalsanin Bialtu Pastor Vanlalliana Sonset kutah baprisma an chang a. Hei hian boruak a siam lian hle a, sawi tùr tam tak awm zingah an Bâwlpu, Pu Bisamjoya chanchin tawi tain han um zui hlek ila.

Pu Bisamjoya hi Langkaih ruama an bâwlpu ÷ha ber niin, mite pawh dáwi na thei hiala thiltihtheihna (*power*) neia ngaih a ni. Khatia Kristiana a rawn inpe kha ringlo hovin an la na hle a. Hetiang hian an sawi a

“*Kan ár, kèl leh vawk te inthawi nán min talhsak ÷euh tawh. Chuwàngin, min rùl tùr a ni; a nih loh chuan amah kan sât hlum ve ang,*” tiin. A thlavâng hauhvin Pastor te pawh kan va kal leh zak zak a; eng em chu an ti ta lo.

Nimahsela, thla ruk vél hnu-ah hrawk *cancer* a nei hlauh mai a, a pawh hle. Ringlote chuan amah thlem lét tumin a natna denchenin an bei nasa mai a. Pathian remruatna hi mihring tán chuan hriatthiam a harsat cháng a awm fo. A dam nán leh nghet taka a awm theih nán keini pawh kan ÷awngtai nasa. Nimahsela, taksa damna ni lovin thlarau damna famkim chang tùrin ni 9.11.2016 khán min chawlhsan ta a. A sakhua hluia kir tùra an thlem nasat viau lai pawha a chhanna mâwl tê chu, “*Kristiante Pathian hnênah ka kal duh alâwm; kir thei ka ni tawh lo,*” tiin. Pathian thu tlém tê a hriat kha a thih thlengin rinawm takin a vuan tlat a ni.

Khulicherra-ah hian ringthar kan neih chhoh

belh zêl bâkah páwl dang aţanga rawn pakai an awm bawk a. Tûnah chuan chhúngkua 17, member 84 niin Cachar Tlangram Presbytery 2017-in a phalsak angin ni 16.1.2018 khán Kohran puitlingah hlan kai a ni.

3. Pipla khua: Pipla hi Ranglong khua a ni a. An Ranglong Hindu Kalim (Roréltu) nupui Pi Ortonli hi Kristianna duh lo berte zinga mi a ni ngei ang. Kan missionary-ten Isua Krista Chanchin Tha hrih an tum pawhin ngaithla duh lovin a lu leh kut thin khumin a kal sawn daih thin. A pasal ve thung chuan Missionary-te Pathian thu sawi dawngsawng fuhin kum 2014 khán Bialtu Pastor kutah Baptisma a chang a. *'I pasal pawh a Kristian tawh si a, lo inpe ve tawh la,'* tia han sàwm pawhin heti hian min chháng mai thin, *"Lamkhuang kungah theihai a rah ngai em ni? Ka nu leh pa, ka pi leh ka pu te hi Hindu niin an thi a, an hnung ka zui ve dawn a ni,"* tiin. A rilru a sak hle.

Nimahsela, Pipla Presbyterian Kohhranten a tán hian báng lovin an ţawngţai thin a. Kum 2016 kum tir lam aţangin Pathian thu te ngaithla duhin, Thlarau Thianghlimin zawi zawiin a rilruah thu sawi chho va. A rilru sak tak chu tihtuirala awmin ni 17 July, 2016 khán Baptisma a chang ve ta a ni. Kan Pathian Engkimtitheia chuan *lamkhuang kungah theihai* a rahtir ta a.

Pipla-ah hian ringthar te nei chho zêlin ni 28.1.2018-a Bial KTP Conference an khuaa kan neih ţum khán Pipla khuaa ring lo la awm chhun chuan Bialtu Pastor kutah Baptisma a chang a, kan lâwm hle. Pipla chu *cent percent* Kristian khua tia chhal theih a ni ta.

Tlipna: Kan târ lan loh pawh hi Pathian hnathawh ropui tak tak sawi tûr a la tam mai. Hêng zawng zawng a thlen theihna chhan chu Mizoram Kohhranho Ramthar tâna an inphalna avâng leh bang lova min ţawngţaipui thin vâng a ni e.



EVANGELIST TEACHER-TE HIAN ENG NGE AN TIH?

Lalremruati Royte, ET
Khasan, Arunachal East

Rawngbáwl tùra Pathian kohna kan hriat nat tak tak lai kha chuan kal chhuah vat vata, ringlo zíngha Pathian thu tlangaupui thuai thuai mawlh mai kha rilruah a awm et et thin.

POSTING KAN HRIA: Kan hotute ruahmanna fel tak hnuaiyah training neia *subject* chi hrang hrang, kan rawngbáwl na atána tãngkai tùr min zirtir hnuah, tlumte thlir taka kan lo thlir kan posting kan hre ta. Evangelist nih inring ràn ràn kha ‘Evangelist Teacher in ni dawn’ an rawn ti mai a.

‘Sikul naupang zirtir tùrin mahni ram chhúng chhuahsan kher eng nge a ngaihna?’... ‘Missionary nih ve tâk vêka zirtirtu nih chu mi pawhin min ngai missionary lo vang,’ tih te leh ngaihtuahna chi hrang hrang a lo lût zut zut mai a.

KAN HNAAH KAN BUNG TA: Sikul kan han kal ta a; naupang zasarih

rual zíngha a zâtve dawn mai chu Hindu an lo ni a. Class lâk hmaa *devotion* kan han nei, zirtirtute Pathian thu sawi ngaihnawm ti êm êm maia an ngaihthla hmél han hmuh chuan, ‘E heu! Ni tin kan kiangah ringlo, Pathian thu hrilh tùr an awm reng dawn a lo nih hi,’ tih min ngaihtuah thartirin phurna nasa tak min pe ngâh a.

GOSPEL WEEK: Sikul naupangte puala kum tina kan neih thin, Gospel Camping te hi ringlo nu leh pa eng nge maw zâtin duh vak lo mah se, sikul atãnga an fate lâk chhuah phah nân chuan an hmang phal chuang lo. Hei tak hi remchâng tha tak mai a ni a, Evangelist-te tán pawh school avàng hian thui takin kawng a inhawng thei thin a ni. Tùm khat chu kum 10

chhúnga kan sikul naupang baptisma chang zât kha kan han chhût chhin a, chawhrualin kum tinin mi 24-in baptisma chang ang an lo ni.

Sikul hrang hrang leh State hrang hrangah hian kan zirlai naupang nu leh pate inhawn dân a inchen lo viau a; nimahsela, kan mission sikul tin deuh thawa kan zirlai ringlo tam zâwk hian Isua hi an thinlungah rinna nghet tak an nei thin a ni. Entirna pakhat han sawi ila: Kan thawhpui pakhat chuan a sikul thawhna hmasaa zirlai pakhat chanchin heti hian a sawi a:

“Tum khat chu kan zirlai pakhat, pawl nga zirlai hi a boral a. A boral hnu lawkah chuan chu naupang pa chuan zirtirtu zaung zaung an ina chaw ei tûrin min sáwm a.

“An in kan va thlen chuan, ‘Ka fapa damlohna avàng hian phaiah min refer a, mahse a that chhuah theih loh avàngin inah kan rawn hauwpui a.

A thih dawn tēpah chuan, ‘Ka pa ṭawngṭai rawh.’ min ti a; mahse, ka ṭawngṭai thiam si lo va. Amah chuan zawi tē tēin Lal Ṭawngṭaina in sawi thin kha a sawi chhuak a. A ṭawngṭai zo chuan, hlim êm êmin, ‘Ka pa, khi, kawr vār mawi tak ha-ten min rawn hruai dawn e,’ tiin hlim takin a chatthla ta a ni,’ tiin a sawi a.”

MI MALIN, MAHNI THIAM DÂN HRANG

HRANGIN: Sikul hun hman dân pangngai, *devotion* leh *gospel camping* neih bâkah hian mahni class lâk lai remchângah Pathian thu sawina hun ṭha takte pawh a awm thin a.

Tum khat pawh kan Pastor hian kan sikul kal tûr min lo ko va, “Nizàn dár 11:00-ah khan in sikul naupang pakhatin, ‘Zânin-ah là lâ baptisma chan ka duh a ni,’ a ti a. A chhan ka han zawh chuan, ‘Sikula class a lâk laia kan zirtirtuin Pathian thu a sawi khân ka rilru a hneh êm êm a, baptisma chang lova awm ka ngam tawh

lo a ni,' a ti," tiin min
hrih a.

COUNSELING EXTRA

CLASS: Kan zirlaite *course* zir chhuahpui loh hlauva zirtirtu thahnemngai tak takten tlai school banah te, inrinniah te a thlawna *tuition* an pêk thin bâkah zirlai naupangte taksa leh thlarau harsatna leh mamawh puhrukna atâna *counseling extra class* neihpui hi thil tangkai leh hlâwk tak mai a ni a.

Naupangte hian a fâla a mal mala an harsatna an han sawi chuan tanpuitu mamawh tak tak, in lama tanpuitu nu leh pa mumal nei lo an lo awm fur thin. Hetianga sikul ban hnua *counseling class* neih ațanga Hindu naupang baptisma lo chang ta te, ringtu naupang nun buai leh harsatna nei, rinnaa Chiang lo, lo Chiang thar phah ta te pawh an awm thin a; rawngbâwna hlâwk tak a ni.

Hêng bâkah hian zirtirtu thenkhat chuan zirlai naupangte chu

țawngțai thupui leh an harsatnate ziaka theh lût tûrin an hrih a. Zirtirtute hmai hmaa an sawi ngam loh an mi mal leh chhúngkaw harsatna thlengin an rawn ziak thin. Chûng an harsatnate chu Pathian hnênah thahnemngai takin an lo thlensak thin a ni.

SIKUL NAUPANG-TE

LEH KOHHRAN: Kan ringlo naupangte hnêna Krista Chanchin Țha hrih mai bâkah hian sikul hi kan ringtu fate *training*-na hmun Țha tak mai a ni bawk a. Kan kohhrana nu leh pa tam tak hi lehkha thiam lo leh thiam sang lo tê tê an ni a, fanau enkawl leh kaihhruai ngaihna hre lo tak takte pawh an awm nual a ni. Kan kohhran hmun tam takah, tûna kan zirlai ni mek te leh zir chhuak tawh te hi an awmna kohhrana zai hruaitu, Sunday school zirtirtu, dar vawtu leh thuhrlitu atâna mi tangkai tak tak te an ni ve hlawm.

Țum khat pawh kohhran inkhâwm kan

neihnaah, chanchin eng mah hrilh lâwk lovin thuhrlitu chu a rawn kal lo tlat mai a. Inkhâwm hruaitu chuan thuhrlitu awm lova banna siam mai chu a duh si lo va. *“Thuhrlitu aiawha ding thei apiang lo chhuak mai teh u,”* a ti a. Chutah chuan kan sikula Pawl IX zirlai chu a rawn chhuak a, *“Sikul devotion-a kan zirtirtute Pathian thu min hrilh ka rilru hneh êm êm ðhinte ka han hrilh (share) ve ang che u,”* tiin tui êm êmin a rawn sermon ve ta pap pap mai.

MISSIONARY ZIRLAI:

Kan zirlai (Kristian)-te hian, an ringlo ðhiante hi an vei ve hlawm êm êm a ni.

Mipa naupang pakhat chuan ringlo naupang pakhat chu *target*-ah a lo insiam a, a lehkhabu kârahte Pathian thu ziate a zep ru a. Lehkhathawnte a thawn a, a ðawngtaisak tlah tlah mai bawk a. Mittui tla zawih zawihin, *“Lehkha ka zir chhuah hunah hemite khuah hian Pathian thu hril tùra kal ka duh a ni,”* tiin a sawi. A

target naupang pawhin tûnah chuan Isua rinna nghet tak a nei tawh a, a chhûngte hnênah pawh Kristiana inleh a dil a; an la remti thei si lo. Hetiang zirlai hi kan mission sikulah hian mi ðhahnem tak an awm a, ðawngtaipui pawh an ngai êm êm a ni.

Sikula ni tina rawng-bâwlna bâkah hian *hostel*-a kan rawngbâwlnaa Pathian malsâwmna kan hmuh eng emaw zât zinga ðhenkhat han târ lang ila. Pawl VIII zirlai, hmeichhe naupang pakhat chuan an kuaah ringtu an pun theih nân leh an kohhranin Pathian thu hrila feh chhuah an uar theih nân Pathianni tinin chaw ngheiin a ðawngtai ðhin a. Pathianin a ðawngtaina chhângin an kohhran hi Chanchin ðha hrila feh chhuahah an tui ta êm êm mai a, an kohhran member tlém tê ni ðhin kha member 100 dawn lai mai an lo ni ta a ni!

Kan *hostel* naupang unau pahnih pawhin, kum thum liam ta (Pawl IV leh

Pawl VI an nih lai) aţangin an pa zu in nasa lutuk t n leh an chh ngkuaa kristian an nih theihna t rin Pathianni tinin chaw ngheiin an  awng tai  thin a. Tin, *hostel*-a an  hiante pawh hian an  awng taipui liam liam  thin. Tichuan, Pathianin an  awng taina chh ngin t nah hian an chh ngkuain Kristianah l tin kohhrana mi  angkai tak an ni tawh a ni.

Naupang pakhat pawhin *hostel*-a a rawn awm aţangin a pa, z n tina lehkha deng t ra chhuaka, z n rei taka a lo haw ziah  thin av nga a nu leh pa inhau nasa  thin lutuk chu hrehawm tiin, a  awng taisak ta  thin a. “*T nah chuan ka pa chuan lehkha deng t ra a leng  thin pawh a sim ta a, ka nu leh pa pawh an inhau tawh ngai lo a ni. Isua hian min  anpui tih ka hria a ni. Hemi hnu a ang hi chuan Hindu chh ngku a ni mah ila, ina ka haw apiangin Biak Inah ka inkh wm ziah tawh a ni; Mandir-ah ka kal ngai tawh lo,*” a ti.

EVANGELIST TEACHER LEH KOHHRAN ENKAWL:

‘*Teacher*’ tih ni ringawt lova, ‘*Evangelist Teacher*’ kan nih miau av ngin sikul ringawt hi kan rawngb wlna a ni thei lo. Sikul ringawtah hian thawk t rin min ti pawh ni se nuam kan ti zawk hek lo vang. Chuv ng chuan zirtirtute leh an chh ngkuate  theuh hian enkawl b k kohhran kan nei hlawm a, Kohhran inkh wm zawng zawngah kan inkh wm-pui  thin. H ng kan kohhran enkawlte hi ke-a kal ph k lek te, a hla deuh erawh chu Km 8-a hla te an ni bawk. A hmun azirin h ng aia hla te pawh hi an la awm fur ang.

Tichuan, h ng kan kohhran enkawla kan va lawina  theuhvah hian kohhran inkh wm, kohhran hmeichhia leh  thalai inkh wmah te kan tel b kah, *committee*-ah kan telpui vek a. Kohhrana mi hla tlawh chhuah leh kohhran mi tlawh te, kan enkawl kohhran khaw tina ringlo beih te, a   l a nih

chuan compound anga a huhova beih tùr tein kan chhawp chhuak òin bawk.

Ni tin sikul lam hna bâkah hêng hna dangte hi thawk tùr chuan hun insiamrem thiam leh inhmakhua thiam pawh a òul hle. Nula, mahnia awm leh nu, thawktu tán chuan tlai sikul ban hnu lo chu ringtu tlawh leh ringlo lenchilhna hun hi a tam loh avàngin inkhâwm loh zàn hun remchâng insiam zat

zat a ngai òin. Chuvàngin, tlai lam atána inhmakhuain zing lamah chawhmeh siam òawka, tlai lama Pathian leh a rawngbâwlina avànga chawhmeh òing rin a òul châng a awm fo òin.

Kan rawngbâwlnate hi miten an dem lohna tùr leh Pathian mithmuha rawngbâwlina, meia fiah dâwl kan neih theihna tùrin Evangelist Teacher-te hian òawngòaipui kan ngai êm êm a ni.



**ROHMINGTHANGI MEMORIAL SCHOOL (RTMS)
GOSPEL WEEK** *(Ni 28-30 November, 2017)*

[He thu ziaktu hi kumin aòangin RMS, Karimganj (Barak Area)-ah a thawk òan a ni - Editor]

*K. Saithangpuii, E/T
RTMS Rajiv Nagar*

Rohmingthangi Memorial School hi Mamit District, Home Mission North huam chhúnga awm, Rajiv Nagar khua (*Tuipuibari II tih òin*) Chakma hnam awmna hmun a ni a. He sikul hi 1986-a din (*Middle School: KG-Iaòanga Class - VIII thleng awmna*) a ni. Kum 2017-18 *academic session*-ah hian School naupang 323 an awm a, hêng zingah hian 258 hi ringlo, Buddhist sakhaw bia an ni.

Staff Committee chuan tùn òum Gospel Week chu kum dang ang lo takin zirlai

nu leh pate sàwm vek ni se, a ti a. A chhan chu, naupangin Krista Chhan-

damna Chanchin Ṭha duhin, pawmin, baptisma chang duh mah se, an nu leh paten an remtihpui ṭhin loh vângin a ni. Chutiang chuan sàwmna pawh pêk vek an ni a.

Tin, lungrual takin Speaker atán Pu L. Santi Priyo, Kurbalavasora, Home Mission South-a thawktu sàwm ni se, kan ti a. Chumi atán chuan Synod Office, Lunglei kan dàwr a. Annin rem min lo tihsakin min lo buaipui a, an chungah pawh Staff Committee a làwm tak meuh meuh a ni.

Kár hnih hma lam aṭangin he Gospel Week atán hian Compound-a chêng chhúngkua leh a thei apiangte zàn tinin sikul kawtah ṭhahnemngai takin kan ṭawngṭai ho ṭhin bawk a. Hetianga hun kan hman làwkna aṭang hian sikul naupang zínga ṭhenkhat ringlo mite pawh an rawn tel ṭhin a, hlâwk hlein kan hre nghâl pang a ni.

Nu leh pate sàwm tel tâkah chuan kan Gospel

Week hman tùr chuan ngaihven a hlawh hle mai a. ‘Chakma Issue’ tih thâwm avângin thawktute pawhin, ‘nu leh pa kal tùr kan inhmu ngût ang em?’ tih chu kan inzawhna a ni bawk a. Beisei si, beisei ngam chiah lovin kan lo thlir tawp mai a. Mahse, Pathianin kan ṭawngṭaina min chhansak a, a hun leh ni a lo thlen meuh chuan, sikul naupang nu le pate aṭangin mi 150 lai mai an rawn kal thei a, kan làwm khawp mai.

Tichuan, ni hmasa berah naupangten *item* chi hrang hrang an entir zawhah Speaker-in thu sawi a ṭan nghâl a. Hemi ni-a rawn kal ve lote thlengin a làwmawm záwng leh làwmawm loh záwngin nu leh pate zíng aṭangin a thusawi chuan ngaihven a hlawh zui hle a.

A tûk leha chuan a làwmawm loh zawnga lo ngaihventute zínga mi, huat tùr châng ni àwm takin an rawn kal hlawm bawk a. Hêng mite hian a ni hnihna, *session* ṭum

hnihna, chawhnu lam hun kan òan leh hma deuhvin nasa taka Speaker rawn an khum leh a thusawi lakawiin an rawn tibuai deuh laih laih a; mahse, kan lama òang chu Pathian Nung leh Engkimtithei a nih tlat avàngin buaina lian tham leh thil òa lo thleng êm chu a awm lo. Hei hian thawktute pawh òan rualna nasa tak leh òahnemngaihna a tharin min siamsak a, a làwmawm kan ti hle. Lalpa chu fakín awm zêl rawh se.

A tàwp ber ni-ah chuan, ‘Nu leh pa te chu lo kal tùr an awm tawh lo vang à?’ kan lo ti hman hial a. Mahse Pathianin a ram din tùr a òhulh lo; nu leh pa eng emaw zât an lo kal leh a. Chawhma lamah Speaker hnên àngin Pathian thu ngaihthlâk a ni a, chawhnu lam chu *counselling*-a hun hmanpui an ni thung a. *Counselling class* la lo, zirtirtuten a mal malin an lu chung a kut ngatin an tána òawngòaina kan lo neihpui zêl a; *counselling* zo tawhte nèn òan a na duh hle mai.

Tichuan, Pathian hruaina leh awmpuina changin naupangte nèn mittui tla chungin he hun ropui tak mai hi kan hmang ho thei a, kan làwm hle a ni.

Tin, Class IV-VIII tána *questionnaire* (zawhna thuhmun chhàn tùra sem)-a, ‘*I nu leh paten remti se, Kristian-ah i inpe duh ang em?’ tih chu, ‘inpe duh ang,’* tiin a tam zâwk chuan an chháng a ni.

He sikul àng a naupang KG I-VIII thleng kal chhuakte hi Kristianna kawngah an rilru a hmin khawp mai. Mahse, naupangte rinna kawnga dâltu lian tak chu an nu leh pa te hi an ni a. Chumi hriatpui reng chung chuan Staff committee pawhin ngun tak leh uluk taka ngaihtuahin, nu leh pate hi kan sáwm rêng a ni.

Tichuan Staff Committee-in a beisei leh sáwm chhan ang takin Khantlang khua àngin zirlai naupang nu leh pa te zingami, nu pahnih chuan January 22, 2018 khán

Tuipuibari Bialtu Pastor,
Rev. Zonunsanga kutah
baptisma an chang ve ta.
Kan va lâwm êm!

A tàwpna atán chuan:
naupangten huaisenna an
mamawh hle; tin, an nu leh
paten Isua Krista hi dodâl

mai lova chhandama an
awm tlan theihna tùrin an
tán ÷hahnemngai takin i
÷awng÷ai chhunzawm zêl
ang u. Kohhranhoten sum
leh pai, tha leh zung in sen
te, in ÷awng÷ai te hi a
thlâwn lo a ni. Nasa
lehzualin i ÷ang zêl ang u.



2017 BATHAKHAL KRISMAS UTSAV

R. Lalchhanhima

Barak Area-in Bathakhal Krismas Utsav
(Festival)-a senso atána SMB Project List-a ₹ 1,00,000/
- an rawn dah chu Tuikual Kohhranin chhângin, ni 23-
27 Dec., 2017 chhúng khán mi 21 chu zíng dár 7-ah Upa
Lalsangzuala Sailo-in ÷awng÷aia min thlah hnuin kan
feh chhuak a.

Bilkhawthlir-ah Pi
Ngurtinchhingin an khuaa
lo zuk kal hmasain
túk÷huan min lo
buatsaihsak a, a làwmawm
hle. Pi Saplianin bel
nawhna tùr min paitír a,
Upa Biaksangaten thuk
lian pahnih man lovin min
kentír a, Pi Stefi, Lungdai-
in Iskut ip khat a rawn
thawh bawk a, kan kalna
Tourist Bus lahin a senso
hniam thei ang berin min
hmantír bawk a, a khalhtu
Mapuia lah a fel êm êm mai

bawk si a. Mi inphal leh
inpete zarah sum senna tùr
sutkianin a awm a, a
làwmawm hle.

Karimganj-ah Pu John
Becker-a, a ram mi
thawktuin min lo hmuak a.
Zân dár 9:30 vèlah
Baithakhal kan thleng a,
Pu LH Lalbiaksanga te
nupa leh a hmun÷hu Upa
Lalrinawma te nupa leh
ringthar eng emaw zâtin
hlim takin min lo
dawngsawng a, kan hlim

tlang dar dar hle. Thawktute inpêkna a ropuiin an fakawm hle.

Zaia rawngbâwl tûrin Elizabeth Varte, Durtlang nula kan sáwm a; ani hi kal lo ta se keiniho ngawt chu kan ropui vak lo vang le! Mizo hla pakhat tal sa tûrin an ngen a; chu nèn chuan vawi 9 (kua) lai zaia rawngbâwl na a nei a ni, a inpêkna a ropui hle.

Baithakhal kohhranah kan inngat a, chuta țang chuan Kolkalighat leh Patharkandi Kohhran (Baithakhal ațanga Km 9 vêl)-ah kan va inkhâwm a. Hêng kohhran pathum hian a huhovin ‘KRISMAS UTSAV’ hi Baithakhal Kohhran Biak Inah kan hmang a ni.

Ringtu sawhnghehna lama hun hman a ni tlangpui a, hun hmangtute pawhin chu lam hawi deuh vek chuan thu an sawi nghe nghe a. Hun hmangtute chu: Ni 24 Dec-ah Kohhran pathum - Baithakhal Kohhranah Pu V. Zasiama, Kolkalighat

Kohhranah Pu Siamkhuma, Patharkandi Kohhranah Pu R. Lalchanhima. Hemi zàn hian a huhovin Kolkalighat Kohhranah inkhâwm leh a ni a, chutah chuan Pu R. Lalchhanhiman hun a hmang leh a ni.

Ni 25 Dec-ah Bathakhal Kohhranah chawhma inkhâwmah Pu Vânlalsawla, chawhnu inkhâwm Pu R. Lalchhanhiman a kaihruai bawk. Zânah Tv. Lalrimawia Hnamte-in hun a hmang a, Ni 26 chawhma inkhâwmah Pu HB Lalramtiaman hun a hmang leh a, zânah Upa R. Lianzualan inthlahna leh fuihna thuchah țha tak a sawi a, a lâwmawm hle. Ringlo tlangval rual an rawn inkhâwm a, lukhum an rawn khum lût veng vung hlawm a, an fel hmêl hlawm hle nghe nghe a ni. Ringtu an la nih thuai a beiseiawm hle. Kan hlim viau mai a.

Hall an la neih loh avângin Krismas zàn inkhâwm bânah Biak In chhûngah inpawl khâwmin hlim takin an hnam lam ‘JUMUR’-in kan lám nasa

mai a, nula tlangvalin nuam an ti hle. A tâwz zànah 'Daya Sagar' Isua fim kan chhuah a, an hlut viau bawk. Lalpa thatna zâr kan zo nasa hle.

La inthlahlel tak chungin ni 27.12.2017-ah kan tinsan ta a. Haw kawngah kan Missionary Pi Laldawngliani Zote, Karimganj tlawh ni pah fâwmin Pastor Zobiak-tluanga ten tûkthuan min lo buatsaihsak kan kil chho va. Kan kohhran hma lâk mék, Punjabi Kohhran Biak In sak lai in rel te kan va thlir ho bawk a (*Kristianna duh lo thenkhat sawiselna avànga chhunzawn theih rih loh a ni*).

Kan missionary, MDTC Director Pu C. Lalzawmliana te chhúngin Bualpuiah zanriah min lo buatsaihsak chu hlim takin kan kil ho va, inthlahlel tak chung a inthenin kan chhuahsan leh ta a. Zàn dár

11-ah in kan thleng leh ta a ni.

Thu naw: A kalte hi kan ropui lua lo hle tih tichiangtu chu hêngah hian a lang Chiang hle. An khaw hming kan lam dik thei lo va, Pulpit-a thusawitu pakhat pheih chuan a thusawina khaw hming a theinghilh hmin that a. A thenin Baithakhal te *Baitikal* an ti a, a thenin Kolkalighat lah *Kolkalitha* an lo ti bawk a, haw kawngah Badarpur lah *Bazarpur* an lo ti rawl bawk nèn; Lalpan mi inpe apiangte erawh a hmang tih chu a Chiang viau thung a ni. Châm chhúngin mi an ngaiin mi an thlahlel ve viau tih an tilang thiam hle.

Pathian min hruaina ropui tak hmu nia kan inhriat leh Lalpaa kan lâwmna chu - Lalpan kan kal chhan ber ringtharte hlim leh nuam ti ém ém hmél min hmuhtir kha a ni. Lalpa chu fakín awm rawh se.

**KUM 2017 CHHUNGA MISSIONARY TANA RAMTHAR
CHANCHINBU LÂKSAKTU - chhunzawmna**

87. New Capital Complex Kohhran	42	2,520
88. Tlangnuam Kohhran Kohhran	60	3,600

RAMTHAR RAWNGBÂWLNA

P.C. Luangmuana, Reiek Sikul Veng

Ramtharbu hi kum eng emaw zât chu ka lo la ve ta a. Pathian Thu lamah leh a bîkin, ramthar lamah min tiharhin, ngaihtuahna min siam nasa; a hlâwkin a bengvarthlâk. Lâk a manhla-in a hlutawm tak meuh a ni.

Ramthar Chanchinbu hnathawh leh rawngbâwlna hi hna pawimawh leh tangkai a ni a. Thuchah ropui tak tak te, sermon te leh mi thiamte article ropui tak tak te hian a tihlu-in a tipawimawh zual a. Buhmun ațanga a hmuna thawktu, inpe zo leh fakawm tak takte ațanga thu chhuahte hian lâwmna thar leh țan lâkna tûr lam – thawktute thawhrînzia leh an harsatnaah pawh Lalpa hnathawh ropui, hnehna leh hmasâwnna, ram lâk thar zêl thlengin min hriattîr a.

Chanchin Țha mi tin tân a ni a. Khawvêl hnam zawng zawng hnênah thil siam zawng zawng hnênah hriattîr tûr a ni. He hna pawimawh êm êm mai hi Synod ramthar lam hma lâkna pawimawh a ni. Hun harsa leh khirh lutukin min tihbuai lohvin Lalpa

hruainain hma lam a pan mék zêl a, a lâwmawm tak meuh a ni. Ringtu mi mal tin hi Chanchin Țha puan darhna hna thawk tûr kan nih inhria-in, kal chhuak ve lo pawhin awmhmuna tal theih tâwp i chhuah ve zêl ang u.

Lalpa kan Pathianin a thawktute a awmpui a, a țanpui zêl a, Ramthar Chanchinbu-in a kum 34-na a lo thleng ta hi lâwmawm ka lo ti ve a. Hma lam hunah pawh zau zâwka rawng a bâwl zui zêl theih nân, ramthim ramthara siama Chhandamna Chanchin Țha tih-èn loh hmun thim leh hrehawm taka la awm mékte ènna hmuhtîr thei tûra thawktuten hna an thawh chhunzawm zêl theih nân Lalpan vengin, awmpuiin țanpui zêl rawh se, tih hi ka duhsakna leh ka țawngțaipuina a ni e. Ramthar Chanchinbu dam khua sei mawlh rawh se.



RAMTHAR FEH

1.

1. **Field hming** : Barak Area
2. **Khua** : Winchester School
3. **Tlawh hun chhúng** : Ni 13-16 Nov., 2017
4. **Tlawhtu** : Hlimen Kohhran
5. **Kal zât** : Mipa – 10; Hmeichhia - 4
6. **Tlawh chhan** : Ramthar rawngbâwlina hmun tlawh
7. **Senso zât** : ₹ 50,525.00
8. **Làwmawm lam**: Ni 13 zing dâr 6:00-ah Pu Thanthuama, Committee member-in tawngtaiin min thlah a; MDTC, Bualpui te, James Winchester an thahna hmun te, hemi hmuna Prayer Hall te tlawhin tawngtaina hun kan hmang a. Kahrawt Bialtu Pastor Quarters-ah Pastor E. Ramchullova hovin bial chhúng Evangelist-te nèn inkawm hona hun kan hmang a. Hemi hnua hian Winchester School Compound lamah pheiin Pu Lalrinawma, Headmaster hovin thawktuten min lo dawngsawng a, KTP-ten zanriah tuihnai tak min lo buatsaihsak bawk.

Nilai zànah kan leader, Pastor C. Sapaian thuchah a sawi a, inkhâwm boruak a nuam hle. Helai hmunah hian inkaihhraina tha tak hnuaiah rawngbâwlina kalpui a ni a, an hma lâk dân a tha hle. Kan tlawh kohhrante hi tanpuina sum fai kan hlan ve hlawm a ni.

9. Report tûl dang: Rilru khawih zualte:

1) *Tinsorai (Kiwi hnam) khua*: Telkatta khaw mite Kristiana an inpêk tuma Kristian zing awm duh lova Pu Tinsoraian khaw thar a din a ni. Hindu-ah an la ruh hle. A khuua mite chu Kristiana an inpêk a phal thu sawi mah se, an pun chak loh dân en hian a la thunun deuh niin a lang. A kawngkapui pawn lamah chuan inthawina thil leh ramhuai hnêna a intiamna (manasi) thi ni àwm tak a la târ thût mai. SMB-in nula pakhat a dah a, quarters a la neih loh avàngin Biak In a la luah a, inkhâwm nân an hmang bawk. Quarters sakna tûr pêk a ni tawh a, Telkatta (Km 3)-a thawktute leh kohhranhoten hnatlangin quarters

sak hna an lo ãan mèk. Tinsorai khua aãanga mèl khat leka hla, Ramchand khua hi Kristian lo tawh ãhin, bansan lehte an ni.

2) *Kosobcherra (Bru) khua*: School an nei lo. Tui an harsa. An tui tlan hi ran leh mihringin avàngin a nu reng a, tuichhunchhuah (ring well) pe theitu an mamawh hle. Pathian hruainain ni 17 zing dár 1:15-ah kan veng kan thleng leh ta a ni.

Saikapkung, Ramthar Vice Chairman

2.

1. **Field hming** : Tripura Mission Field
2. **Khua** : Sibbari
3. **Tlawh hun chhúng**: Ni 13-16 Nov., 2017
4. **Tlawhtu** : Kawrtethawveng Kohhran Pavalai Pawl
5. **Kal zât** : Mipa – 21; Hmeichhia - 4
6. **Tlawh chhan**: Hnathawh
7. **Hnathawh** : Biak In sak
8. **Làwmawm lam**: Ni 13.11.2017 zing dár 8:30-ah Kawrtethawveng aãangin kan chhuak a, tuang takin Kanhmun kan thleng a. Hetah hian Sibbari-a thawktu Nl. H.S. Lalmuanpuin min lo hmuak a. Tlai dár 5:00-ah kan inngahna tùr Singirbil Kohhran kan thleng.

A tùk niléngin Biak In sak hna kan thawk a; zàn lamah Sibbari Biak Inah kan inkhâwm a. Ni 15 zing kár aãangin kan thawh chhunzawm leh a. Hemi zàn hian (Tuingoi) Bialtu Pastor Rev. Zoremliana Pachuau-in Singirbil Kohhranah ringthar pakhat baptiama a chantír.

Kan thawh theih ang tâwk te kan thawh hnuin ni 16.11.2017 zing dár 9:00-ah kan haw leh a. Member kalten zawngchhang tlâk kan tiin kan hlim tlang hle. Pathian hruainaah kan lâwm hle.

Ngurnunmawia, Kohhran Pavalai Pawl Ziaktu

3.

1. **Field hming** : Barak Area
2. **Khua** : Doyapur

- 3. Tlawh hun chhúng:** Ni 13-17 Nov., 2017
- 4. Tlawhtu** : Dawrpui Vengthar West Kohhran
- 5. Kal zât** : Mipa – 16; Hmeichhia - 9
- 6. Tlawh chhan** : Hnathawh
- 7. Hnathawh** : Missionary quarters sak
- 8. Senso zât** : ₹ 73,970.00
- 9. Lâwmawm lam:** Ni 13 zing dár 7:00-ah Upa JHC Aichhunga, Work Camp leader-in tawngtâina a hman hnu-ah kal chhuak nghâlin tlai dár 6:30-ah tuang takin Doyapur kan thleng. Upa Lalbiakmawia (Ramthar Comt. Chairman) leh Upa Laltharmawia ten min ho thei a ni. Doyapur-ah hian Bialtu Pastor leh thawktuten min lo dawngsawngin zanriah min lo buatsaihsak a ni.

Ni 14 zing kár aţanga thawk ţanin kan thawkrîm tlang hle a; zing aţanga tlai ni tlâk thleng kan thawk ţhin a ni. Kan thawh tûra ruahman lâwk – a chung rangva chih, *tile* hmanga in chhúng leh *verandah ceiling* siam, lei vûng hmanga chhuat chhûn khah te a ni a. Hêng bâkah hian chhuat chhut muk, chhuata brick phah chhuah, compound sam fai, lei vûng dâwna tûr brick rem, Biak In chokut thlâk leh siam ţhat ngai dang te kan thawk tel bawk.

10. Report ţul dang: Doyapur hi Udharbond Pastor Biala awm a ni a. Bialtu Pastor Chinmoy Purkayastha te, Evangelist te leh kohhran mi ţhenlhat ten an remchân angin hna min thawhpui ţhin a. A bîk takin, Doyapur hmuna Evangelist Pi Rosy leh a pasal, Pu Rakhm, Doyapur Kohhran Chairman ni mék ten eng lai pawhin min awmchilh a. Thawh hona ţha, thinlung taka inpawhna kan neih avângin kan lâwm a, nuam pawh kan ti hle. Doyapur Preaching Station-a Krîsmas hman nân ₹ 10,000.00 kan pe bawk a ni.

H. Lalfakzuala, Ramthar Ziaktu

4.

- 1. Field hming** : Karbi Anglong Mission Field
- 2. Khua** : Hangjanglanso

- 3. Tlawh hun chhúng:** Ni 13-16 Nov., 2017
- 4. Tlawhtu** : Kolasib Venglai Kohhran
- 5. Kal zât** : Mipa – 9; Hmeichhia - 7
- 6. Tlawh chhan** : Hnathawh leh Field tlawh
- 7. Hnathawh** : Sunday School hall sak leh Field tlawh
- 8. Senso zât** : ₹ 79,950.00
- 9. Làwmawm lam:** Ni 17.11.2017-ah Harlangso Kohhranah Sunday School hall sak bul kan ÷anpui a. A tûk, Inrinniah Silonijan Mission Compound kan tlawh a. Biak In chhúngah ÷awngñai hona hun kan hmang a; Kohhran Hmeichhiaten ringtharte ÷anpuina atán Second hand min kentir kan hlan a, Ramthar Committee-in ÷anpuina sum fai kan hlan bawk. Pathiannah hmun thumah inñhenin, Sarihajan Bial chhúng kohhran pathum – Hangjanglanso, Sarihajan leh Langsangti-ah te kan inkhâwm a. Hêng Kohhrante hi ÷anpuina sum kan hlan ÷heuh a ni. Zân lamah Sarihajan Mission Compound-ah thawktute nèn inkawm hona hlimawm leh hlâwk tak kan hmang a. Kohhran Hmeichhiaten Second hand min kentir chu thawktuten a ÷ûl an tih anga an sem tûrin kan hlan leh bawk.

10. Report ÷ûl dang: Karbi Anglong Synod hi ni 29 March, 2015-ah Mizoram Synod-ah hlan a ni a. Thawktute hian engkim zirtîrin anmahni ke-a dintîr tûrin hma an lâkpui nasa hle a. Tûn ÷umah pawh hian hun danga kan tih dân anglo takin, a bul kan ÷an-pui chauh a ni; hei hi kohhrante hma lâkna leh kutthlâkna a tel ve ngei tûr a ni, tia ruahmanna a awm sa vâng a ni.

Sarihajan Bialah hian kohhran puitling 10, Preaching Station 2, Dân zawhkim 539 leh kohhran member 891 an awm a ni.

R. Lalhmingthanga, Ramthar Ziaktu

5.

- 1. Field hming** : Home Mission South
- 2. Khua** : Darlak
- 3. Tlawh hun chhúng:** Ni 16-21 Nov., 2017

- 4. Tlawhtu** : Dawrpui Vengthar West Kohhran
5. Kal zât : Mi 15
6. Tlawh chhan : Hnathawh
7. Hnathawh : Masihi Sangati Biak In sak
8. Senso zât : ₹1,21,740.00

9. Làwmawm lam: Biak In sak òan a nih hmáin Upa Sangzuala, Darlak Kohhran Ziaktu chuan thingzai òul ang ang te min lo lâk khâwmsak a. Ama thingzai khawl a thlâwnin min hmantír bawk a. Kohhran mi te, hnam dang ringthar, khu lai biala awnten an remchan angin hna min thawhpui bawk a, a làwmawm kan ti hle. Kan kohhran mi, Upa Lalchhungan Biak In chung òur rangva *bundle* ruk lai mai a thawh a, mi inphal tak tak – Upa Laltharmawia, Upa Lalchhunga, Tv. Lalrinmawia leh Pu JR Chhuana ten Work Camp kal nán leh bungraw phurh nán an motor an thawh a, a làwmawm kan ti hle.

10. Report òul dang: Biak In (24x16 ft) leh a hulhliap (6 ft) chu a chung rangva, a bang *tile*, a chhuat *cement* hmanga sak a ni a. Pulpit leh inkhâwm òhutthleng (ngnhenchhan nei) eng emaw zât siam tel a ni bawk.

H. Lalfakzuala, Ramthar Ziaktu

6.

- 1. Field hming** : Barak Area
2. Khua : Manikbond
3. Tlawh hun chhúng: Ni 20-23 Nov., 2017
4. Tlawhtu : Bilkhawthlir Kohhran
5. Kal zât : Mipa – 25; Hmeichhia - 7
6. Tlawh chhan : Hnathawh
7. Hnathawh : Biak In chung chih
8. Senso zât : ₹ 58,180.00
9. Làwmawm lam: Bialtu Pastor leh Kohhranhoten min lo dawngsawng òha hle a. Biak In hi 70x135 Ft a ni a. Kohhran mi hi in 10 vèl chauh an ni a; '*Biak In kan sak zawh hnu-ah a luah khat òur chu Pathianin min pe mai ang,*' an ti. Pathianah rinna nghet tak nèn hma lam an thlir a, i òawngòaipui zèl ang u.

Upa V.L. Rawna, Kohhran Ziaktu



SMB RINGTHAR 2018

Sl. No	Field	2017 chhunga ringthar	January 2018 chhunga ringthar dawn chin
1	Arunachal East	188	
2	Arunachal North	268	14
3	Arunachal West	140	10
4	Assam	80	4
5	Barak	230	4
6	Delhi	98	7
7	Jharkhand	507	27
8	Karbi Anglong	204	
9	Home Mission North	129	1
10	Home Mission South	107	
11	Kolkata	825	85
12	Lucknow	424	26
13	Nepal	178	
14	Odisha	98	
15	Patna	225	8
16	Siliguri	180	11
17	Tripura	2031	99
18	Masihi Sangati	1986	67
TOTAL		7898	363



Field Secretary hovin, Bialtu Pastor leh thawktu thenkhat -
Shallang Kohran member-te nen
Changlang Bial, Arunachal Mission Field East

Postal Regn. No MZR/46/2018-2020

RNI Regn. No. 40889/88

Ramthar Himthla



Diblibagh (Home Mission South)-a Sunday School
naupangte Naupang Inkhâwmpuia an kal tûr (2017)



Telkata. Barak Area (Cachar Tlangram)-a Missionary-te -
Asst. Area Promoter hovin

**Published by Rev. K. Lalrinmawia and Printed at the Synod Press, Aizawl on
behalf of Ramthar Association, Aizawl, Mizoram. Copies- 10,000**

To

If not delivered please return to:
The Manager
Ramthar Chanchinbu
Synod Office, Aizawl, Mizoram,
India. Pin - 796001